

## Unner Ieberraschungsgast 2025

Gelei nooch dor Begrießing an unneren Hutznobnd am 6. März, ham mir den erschn Besuch im „Imbiss an dor Vudlstroß“ zen Aalass genumme, im den beedn neien Chefs ne klaane Aufmerksamkeit ze Ieberbrenge: Unnere Bastler ham dodorfier extra in neie Wurzl-Rudi zamgebaut, dar sieht nu aus wie e guter Koch mit samt sein Arbtszeich.

Natierlich ham mir den Tiem allis Gute gewünscht: allzeit viel zufriedne Gäst un in gutn Imsatz, denn dar muss nu mol sei!

Wu unnere Leit allezam ewos ze trinken hattn, ging aa de Asserei schu lus: Mir hattn uns im Vüfald of e ahaatlichs Assn geeinicht: Tafelspitz mit Griene Kließ, Meerrettichsuß un Sauerkraut!

Un des hat alln ringsrim super gut geschmeckt, do freie mir uns schu of unneren nächstn Hutznobnd bei de Witschers am 3. April, mol saah, wos uns dor Koch do aabietn tut.

Bestn Dank for de gute Bewirtung!

Aber nu zen Ieberraschungsgast. Des is gar net esu aafach, jeds Gahr su enn for unneren Hutznobnd ze gewinne. De meestn sei andauernd unnerwags un ham schu in ganzn Haufn Terminle. Aber war sucht, dar find trotzdem en. Su dorgobs siechs, des iech miech wieder mol an den Schnarrtanner dorinnert hab. Dar is immer mit dorbei, wenn drubn ofn Auerschbarg aufgespielt werd. Do tratn ja immer mehrere Arzgebirgsleit mit Instrumentle un Gesang auf, do missn die siech immer weng nei taaln ins Programm. Tja, bei uns kennt dor Löschner - Markus emol



eweng meh aus sein Liederschatz brenge. Also aagerufn un ar hat aa gelei zugesaat.

Pinktlich war dor Markus im Spartnheim – also im „Imbiss an dor Vudlstroß“ - zur Stell un hat seine 2 Instrumenter aufgebaut: e Bandonneon un ne Konzertina. Die sanne zwar fast gleich aus un ham aa alle beede genuch Knepple zen spielen, aber do sei allerhand Unnerschiedle ze beachtn, die muss mor erscht emol beharrschn. Des kaa dor Löschner-Maa aber zen bestn. Kaum hatter sei Zeich hiegericht, kam aa gelei unner Yves mit seiner Harmonika dorzu un hat siech gelei naabn ne mit hiegesetzt. Ja, die zwee kenne siech ja schu alleweil vun unneren Auserschbarg har, su des se e schiens paar Liedle gelei gemeinsam eigespielt ham. Des hat uns alln viel Spaß gemacht, mir konntn un mußtn aafach bei de allbekanntn Arzgebirgsweisen mitsinge! Mit Tangos hätt dor Markus net viel an Hut, hatter gesaat, aber bei sein „Schweine-Tango“ sei mor ausn Lachn gar net rauskumme. Jednfalls wars ne ganz gemietliche un lustiche Stund, die uns die Beedn an den Obnd beschert ham!

*Bis zen nächstn Mol - Dor Schmidt von Haamitvoren!*

